

Plenchi

Bèl a bati

Bèlèm bèlèm ata ora a yega pa nos topa. Kontentu di ta den bo kompania awe riba e dia bendishoná aki. Spera bo tin un wikènt relahá i ku hende dushi rondó di bo.

Nos a drenta kuaresma, tempu pa nos limpia nos kurpa i nos mente. Limpiesa paden i pafo pa asina nos por prepará pa Pasku Grandi. Awe nos ta trese pa bo algun informashon ku awor ku bo ta mas trankil, paso e drukte di karnaval a pasa, bo por konsentrá mihó riba nan. Un entrevista entrevista ku reina di karnaval hubenil. Un hoben ku zjeitu ku ta bon bo mes tende di dje. Ken e ta kiko e gusta. Anto nos ke dunabu unbista di e misa di i pa hubentut ku Obispado a organisá dia 31 di yanuari 2015. Tabata un misa masha bunita mes, ku hopi alegria manera hobennan gusta. Tuma bo tempu awor i disfrutá di e potrètnan aki pa bo tambe haña un bistadi e ambiente durante e misa. Un pabien na pastor Curtis ku e iniciativa aki. Su petishon tabata pa nos sigui duna nos hobennan amor i guia. Pa nos duna gradisimentu na kada adulto ku ta traha inkansablemente na formashon i guia di hobennan. Sra. Ludwina Antersijn i pastor Curtis, por mira bek riba un selebrashon bunita.

Orashon

Señor siñami arma mi mes ku orashon en bes di ku kuchú.

Señor siñami kon bisti ku humildat en bes di ku trahenan luhoso.

Señor siñami kon hinka speransa den un alma deskurashá, ku un palabra di apresio of un sonrisa.

**Tur esaki mi ta pidi Bo Señor,
den nòmber di Tata, Yu i Spiritu Santu.**


Amen

Riba roster

- **Hasi orashon tur mainta i tur anochi**
- **Brasa bo yunan tur dia**
- **Puntra bo yu su opinion i lague papia sin korigí of kritiká.** Ta su opinion i mustré bo ta respetá su opinion. Pa e siña respetá di bo i di otro tambe. Siñé argumentá su opinion dor di puntré dikon òf kiko e kier men. Por ehèmpel kosnan simpel ku bo por puntra ta: Kua ta bo koló favorito i dikon? Si bo tabata minister president kua desishon lo bo tuma pa mucha? Si bo haña hopi sèn regalo kiko lo bo hasi ku ne? Si bo mester skohe entre kumpra un bestia of un telefon, kiko bo ta skohe. Kiko bo ta gusta mas di mi i kiko menos?

Not'é riba bòrchi





Den agènda

Dianan liber di skol

- 1 t/m 10 aprel 2015 Pasku di resurekshon
- 27 aprel dia di Rey,
- 28,29 30 aprel ku 1 di mei dianan ekstra liber

Mi ta konta

Herensia

Pedro tabatin 3 yu hòmber, Pedrito, Frans, i Egbert. Komo Pedro su edat tabata subi e mester a kuminsá papia riba su herensia. Un di su yunan lo bira doño di e tereno ku tin un hòfi fertil, kargá ku pali fruta. E dos otronan lo haña pida tereno mas pareu. Pa hasi e desishon mas honesto el a disidí di bai ku nan ne tereno mas fertil aki. Aki el a bisa nan ku ta un di nan so por haña e tereno aki, esun ku por kana yega mas lihé na e otro punta di e tereno. Nan tur a kuminsá kana. Pedrito ta bló kana wak patras pa wak pa su rumannan no pasé na kaminda. Frans a disidí ku e ta kana ku lomba riba un liña wak si e por yega

promé. Egbert a fiha su bista riba un palu te leu den horizonte i el a kana bai ne palu aki. Egbert a yega promé i a haña e tereno fertil aki. E lès ta, no wak kiko otro ta hasi, of no kana keda wak patras. Pone bo bista riba loke bo ke logra i kana bai derechito na bo meta.

Un preñchi

Entrevista ku reina di Karnaval Hubenil 2015

Kolegio San José ta super orguyoso ku su alumno **Lakeisha Calmera**. Lakeisha ta un alumno ehemplar. E tin hopi aña tras di otro ku e ta sali komo e mihó alumno di klas.

E ta un mucha humilde di Banda Abou i ku mashá rèspèt pa su mayornan, maestronan, e otro alumnonan i tur hende ku ta rònt di dje.

Ni maske ku aña pasá el a bai ku e título máksimo komo Reina Hubenil di Karnaval di Banda Abou i e aña aki Reina Hubenil di Karnaval di Kòrsou tòg Lakeisha a keda un mucha mashá nòrmal i e ta bin skol hasi su lès manera nada no a pasa. P’esei awe un entrevista pa sa mas di Lakeisha. Mama di Lakeisha ta tambe presidente di Komay (**Komishon di Mayor**) ku ta hasi un tremendo trabou pa skol.

Bo ta gusta bo skol?

Si masha hopi mes paso e ambiente na skol ta dushi. Mi tin amiganan dushi i bon i nos maestronan ta siña nos hopi kos.

Kuantu aña bo tin?

Mi tin 10 aña di edat.

Kon yama bo maestro?

Mi maestro yama mener Maurits Mook.

Kiko ta bo plato preferí?

Mi gusta kome warmus ku galiña.

Kiko ta bo hòbi?

Mi gusta balia i kanta.

Kua ta bo materia preferí?

Mi gusta matemátika masha hopi.

Kua ta e koló ku bo gusta mas?

Koló blou ta mi koló faborito.

Kon bo a eksperensiá bo partisipashon den e sertamen pa reina hubenil di karnaval?

E treinmentu tabata masha dushi i mi a siña hopi kos.

Mi a siña ku ora mi ta papia riba esenario mi tin ku wak tur kaminda i no un kaminda so.

Kiko ta e kos ku mas bo a gusta di bo partisipashon.

Mi a gusta ku mi por a saka mi talento i bini ku n'e dilanti.

Kiko ta e konseho ku bo tin pa e hubentut di Kòrsou ku ta bai wak karnaval?

Gosa di karnaval pero na midí, respetá outoridat i tur esnan ku dunabo bon konseho.



Yufrou Jackeline ta entregá un premio na Lakeisha Calmera, reina hubenil di karnaval.



**Lakeisha Calmera reina
karnaval hubenil**

Mucha djispou

**Polis ta mira un yonkuman, Gino, ta toka gitara riba Plasa Brion.
Mesora e polis ta aserké pa puntre si e por muestra su pèrmit. Despues di
un bon ratu buska e ta splika ku e no tin nan huntú ku né. Pero asina e
kaba di toka e ta bai buskanan i hiba warda.**

Polis: “Mener tin ku kompañami mesora anto?”

Gino: “Sigur no, Shon Polis. Kiko Shon Polis ke mi toka?”